

VENDIM
Nr.343, datë 27.3.2008

PËR MIRATIMIN E BURIMEVE DHE TË PROCEDURAVE TË FINANCIMIT TË DËMEVE PASURORE TË SHKAKTUARA NGA AKSIDENTI TEKNOLOGJIK I GËRDECIT

Në mbështetje të nenit 100 të Kushtetutës dhe të ligjit nr.9836, datë 26.11.2007 “Për Buxhetin e Shtetit të vitit 2008”, të ndryshuar, me propozimin e Ministrit të Financave, Këshilli i Ministrave

VENDOSI:

1. Financimi i dëmeve pasurore, të shkaktuara nga aksidenti teknologjik i Gërdecit, bëhet në përputhje me listën dhe vlerën përkatëse, të miratuara në vendimin nr.336, datë 24.3.2008 të Këshillit të Ministrave “Për miratimin e vlerës së dëmeve, të shkaktuara në objektet, pronë private, si rrjedhojë e aksidentit të ndodhur në Gërdec”.

2. Burimet e financimit të dëmeve pasurore, sipas vendimit të sipërpërmendur, në vlerën 1 572 milionë lekë, janë, si më poshtë vijon:

a) Dhurimet e derdhura në llogaritë bankare, të hapura për këtë qëllim, në masën 150 000 000 (njëqind e pesëdhjetë milionë) lekë;

b) Fondi rezervë i Këshillit të Ministrave, në masën 800 000 000 (tetëqind milionë) lekë;

c) Fondi i kontingjencës, në masën 622 000 000 (gjashtëqind e njëzet e dy milionë) lekë.

Dhurimet, nëse rezultojnë mbi vlerën e mësipërme, të rimbursojnë fondin e kontingjencës.

3. Financimi i dëmeve të përfituesve bëhet vetëm në llogaritë bankare, të hapura në emër të tyre, duke zbatuar procedurat e mëposhtme:

a) Njësitë e qeverisjes vendore, në mbështetje të listave të miratuara me vendim të Këshillit të Ministrave, hartojnë listëpagesat përkatëse.

b) Listëpagesat përmbajnë: emrin, atësinë dhe mbiemrin e përfituesit, vlerën e dëmshpërblimit dhe referencat e llogarisë bankare.

c) Njësitë e qeverisjes vendore depozitojnë në Ministrinë e Financave listëpagesat, zyrtarisht dhe në formë elektronike.

ç) Ministria e Financave, në mbështetje të listëpagesave, të përmendura në shkronjën “b” të pikës 3 të këtij vendimi, urdhëron kryerjen e pagesës, nga llogaria e hapur për këtë qëllim në Bankën e Shqipërisë drejtpërdrejt në llogarinë bankare të përfituesve.

4. Ngarkohet Ministria e Financave për zbatimin e këtij vendimi.

Ky vendim hyn në fuqi menjëherë.

KRYEMINISTRI
Sali Berisha